

四庫全書

集部

欽定四庫全書

集部

篋墩文集卷五十

詳校官編修_臣李堯棟

中書_臣劉源溥覆勘

總校官進士_臣朱鈐

校對官監丞_臣張魯炳

謄錄監生_臣李全玉

欽定四庫全書

篁墩文集卷五十

明程敏政撰

傳

楊文懿公傳

公諱守陳字維新姓楊氏浙江鄞縣人曾祖浯卿而上
世以仁富聞其鄉祖範益好修為名儒學者號栖芸先
生別有傳父自懲傳其學官止泉州倉副使公之在妊
也母張宜人夢星落懷中及生天庭有黑子七如北斗

見者奇之五歲即端恪如成人而才識穎異栖芸親教
之日記數百言稍長學舉業及為古文辭屢出流輩四
方多傳其程試之文以為式栖芸恐其溺此恒誨之曰
聖賢之學以慎思力踐為要博文強記輔此而已公大
有所悟入作致知力行持敬三銘以見志景泰庚午舉
浙江鄉試第一人辛未舉進士被選改翰林庶吉士未
幾丁父憂而祖父母相繼卒居喪七年學益邃識益遠
天順戊寅服闋授翰林編修預修大明一統志尋被旨

授徒內侍監辭不許憲宗即位以選為經筵官預修英
宗實錄成化丁亥以考績升侍講踰月實錄成升司經
局洗馬公每進講必積誠意傳經訓冀納忠以感悟上
心一日講武成篇曰魯論稱舜無為而治周書稱武王
垂拱而天下治然後世人主有深拱禁中委政內侍者
召閭樂之禍有高居無為惟寵嬖艷者啟祿山之變何
也蓋舜武之所以無為者由其舉相去凶惇信明義無
一不盡其道皆常憂勞而有為乃始佚樂而無為也後

世人主則孟子所謂安其危而利其菑樂其所以亡者
耳左右聽者竦然至於應制詩文亦舉筆不忘勸戒士
辰選侍講學士校刊通鑑綱目遂預修續通鑑綱目以
母喪去公官五品十六年所教中人已多貴幸凡預教
者率因之以進獨公泊然無少藉有欲出力援之則謝
曰我嫠婦也抱節三十年矣乃垂老而改志邪薦紳往
往傳誦其言今上出閣公等六七人被選日侍講讀文
華大訓成升詹事府少詹事兼翰林侍講學士大訓篇

目多本大學衍義獨事涉中人者悉不以書公曰是何
以為訓撮其賢否得失之故分註一條議者不能奪公
雖晚未遇而名重一時吏部嘗擬公國子祭酒在廷大
臣合詞舉公堪吏部侍郎宜入內閣皆不果用今上登
極加恩宮僚始擢公吏部右侍郎初當道猶擬公南京
上覽疏取筆塗南京二字其被恩眷如此詔集議祧廟
禮官請祧懿祖而以德祖比宋僖祖百世不遷公抗言
禮天子七廟祖有功宗有德乃孔子之言故凡號太祖

者即始祖必事之以配天若商周之契稷者以功而非論其本統也宋之僖祖及我德祖可比商報乙周亞圉非契稷比議者徒謂大儒嘗有取于王安石之說而不從孔子遂使七廟之間既有始祖又有太祖太祖既以配天而不正南向之位名與實乖豈先王之禮哉若謂降而合食為非禮則王者既立始祖之廟又推始祖所自出之帝而祀之固無嫌也憲宗升祔請并祔德懿熙三祖自仁祖以下為七廟異時祧盡則以太祖擬商周

契稷而祧主藏於後寢祫禮於前廟時享則尊太祖祫祭則尊德祖各不失尊庶無悖禮議者不能從而公執甚堅盖有遺恨焉弘治戊申上疏論講學聽政累數百言大略謂陛下御極以來屏棄珍玩放遠奇袤登用正人聽納忠諫躬閱題奏日勤政務若此不懈可幾堯舜獨臣之愚猶有過慮盖革故正始猶易持久保終實難若內得弗深外資弗博銳志少懈欲心漸滋豈能保其始終如一乞開經筵御午朝聽講之際凡所未明輒賜清

問必待聖心洞然明悟而後已一日之間居文華殿之時多處乾清宮之時少使欲寡而心清感少而理明則得於內者深而出治之本立矣午朝有事者皆先用略節口奏而裁決之大政則召大臣面議未當則許諫官駁正而審行之俾賢才常集于目前視聽不偏於左右則資於外者博而致治之綱舉矣若但如近日之聽日講御午朝以應故事凡百題奏皆付內監諸臣調旨批答臣恐積年之弊未革而將來之患難測不但如前所

過慮而已優詔嘉納諭禮部以三月御經筵禮部得請
并午朝如楊某奏修憲宗實錄以公兼副總裁公念更
化初凡吏部有所升黜人必視其忠邪易險愿奸為趨
舍故侶侶持議雖取嫌忌於同列弗苟徇也已酉再請
解部事專史職不許章三上乞致仕始命以本官兼詹
事府丞供職史館如故公嘗言古人謂國可滅史不可
滅我太祖既混一即命儒臣修元史太宗靖難後史官
不紀建文君事遂使當時朝政與忠於所事者皆闕畧

無傳及今猶可補輯景皇帝已復位號而英宗實錄標目猶書邠戾王是宜改正章疏留中者雖有可傳例不得書乞宣付史館奏未及上而公以十月十八日不起初太白犯進賢占者以為賢人厄蓋其應云公疾革語其弟守阯男茂仁曰吾學志為君子仕登三品年邁六十斯亦何憾惟上恩厚未能報先栖芸先生未及封汝曹勉圖報稱以繼吾志諸弟暨男茂元不及訣其以是語之語訖不亂明日端坐而逝訃聞上悼惜賜諡曰文

懿命官諭祭葬事後二年實錄成詔贈公禮部尚書又
三年以春宮舊恩許錄公孫美璜為國子生公天性孝
友筮仕即遭三喪竭力襄事不一舛於禮奉母極孝養
與丁夫人起家偕老肅雍相成未嘗畜女侍奉巾櫛侍
諸弟怡怡自相師友公暇子姪環侍循循雅飭無毫髮
褻養之習在京師所居高坡巷四方來者皆知為楊先
生家敬愛之風薰然被於宦族有宏農之遺範與人交
必以義相規而見善如已出體若不勝衣言若不出口

至說理論事則毅然不可屈自號晉菴晚更號鏡川同
考禮部會試及主考兩京鄉試得人最盛所著述有三
禮周易尚書詩孝經大學中庸論孟私抄凡數百卷皆
正其錯簡更定其章句詮擇諸家之傳註而傳以己見
雖大儒之說不苟同蓋晚年屢加刪定未始輕出也於
書謂舜典象以典刑一章乃舜命官語非史臣記事之
詞古者罪人不孥而漢書引湯誓孥作奴蓋或奴或戮
隨其罪之輕重施之也酒誥明大命于妹邦疑明字本

封字之誤不然則下文乃穆考文王終不可通大誥今
蠹今翼日蔡傳謂今之明日也疑以今蠹今翼為句言
武庚今無知如蟲之蠹動今有輔如鳥之羽翼而以日
字屬下句猶左傳日衛不睦也于詩以卷耳為大夫行
役者之作謂陟岡陟俎馬瘠僕痡非后妃思慮所及以
柏舟為非婦人之作謂其心不可轉威儀不可選正孔
子所謂吾于柏舟見匹夫執志之不可易者也至以鄭
衛之詩非孔子所謂鄭聲其辨尤詳大約謂春秋主事

當無不載詩主辭當有所擇朱子修通鑑綱目於莽操
呂武之事靡不備載其續楚詞則神女季姬皆斷為禮
法之罪人高唐賦亦視為倡家之瀆禮若鄭衛諸篇非
刺淫而果為淫者所自作聖人必不錄之矣其超然獨
見多先儒所未及者又有五經考證大易私徵春秋私
比等書皆未脫稿雜著詩文有晉齋稿鏡川稿東觀稿
桂坊稿金坡稿銓部稿又數百卷閱博精醇兼備衆體
成一家之言讀其文可知其人公弟舉進士者三曰守

隨廣西按察使曰守阯左春坊左諭德曰守隅工部員外郎子二亦皆舉進士曰茂元山東按察副使曰茂仁刑部主事公墓在鄞之玉堂洞山

論曰儒者心學之失傳久矣其上工訓詁以為高其次競辭章以為奇又或以天資用事而能隨世以就功名斯已矣四明自慈湖楊氏師象山東發黃氏師考亭皆卓然知體立用宏顯微不二之義學者尊之若頽波砥柱而栖芸實嗣其傳至公益充大之蓋其始則抱遺經

以求聖人於言表而不以訓詁辭章為能故其持已律
家居官接物視老壯如一日而不少肆其子弟皆謹禮
守法不屈於不義而以古人為可期也夫學術有得於
一心則尊之而不為泰棄之而不為損擇之精守之確
終吾身而不變此所為儒而世往往以迂左目之皆孟
子之所謂失其本心者也公晚遇明天子將有柄用之
漸而阨于老不能究其經綸遠大之業使儒效暴于天
下豈非斯人之不幸哉

俞憲楊君傳

君楊氏諱太榮字崇仁其先居湖廣麻城至君高大父德言元季為統軍萬戶有事于蜀因家鄴都曾大父繼祖大父文興父宏道仕為邑之訓術通諸家負識鑒嘗幼異君曰此子當不凡遣入學為生徒而勗之君果穎出流輩業精行成思亢其宗以天順丁丑舉進士鄴都邑陋僻國朝舉進士實自君始君為人剛直而宅心恕每思為有用之學故遇事不可即勇持之未始以人

言自沮也筮仕大理評事所讞獄必反覆參驗得其平而後已時廬陵王恭毅公長大理慎許可更官屬十餘人獨才君可大用值有詔大臣各舉所知者公即以君名上升江西按察僉事江西民譁訟繁君治之不勞而辦嘗行部九江寧縣盜猝起攻陷郡邑殺將吏衆相顧愕眙計無所從出君不動曰是惡能為徐授策甲士躬督之與格大戮其衆擒其首羅萬珪及黨與三十人未幾盜復起九江君馳往掩捕之擒其首舒原一及黨與七

十人南昌豐城為萬珪餘孽所苦君戒指揮王鏞密捕獲之凡五十二人由是所部帖然無敢倡亂者南昌有權貴人被盜其壻誣仇家數十人君察其狀盡釋之衆危君君毅不顧曰某不能以民命附勢也久之真盜出危者皆愧君建昌豪民楊洪三武斷鄉曲以盜誣朱槐等二十八人死且半君辨其誣而寘豪於法闔邑稱快九江衛百戶田春與巡捕指揮李貴不相能貴知御史金忠素刻嫉盜引春春不勝榜掠誣伏君獨疑之以白

御史石玉玉視案曰成矣時多憚金無敢爭者君即日上其事事下立雪春等十七人聞者壯之君既以洗冤澤物為己任不能復與人媿媿遂大忤權貴人以成化甲午致仕去去之日吏民數千人乞還君當道者方謀所以處之而君有決志不留矣君歸蜀鄉人莫不高其節然君亦不能恣然忘世凡鄉人孤弱而為奸媒理直而為暴令所錮者君必為言上司曰某也冤某也橫某言一出于公上司亦敬聽之冤者得不死而橫者斂迹

君事親孝一第後即有父喪哀毀盡禮家饒於貲而喜
施賑窮濟涉揮所有不吝君在江西貴溪高都憲上達
嘗贈之文稱曰偉丈夫其歸也南昌張太史廷祥大書
其行卷曰林下一翁而序之兩公亦近世聞人其言殆
可徵也

論曰世率謂刑官少仁故多不利其身與其後者是大
不然刑所以輔世之治而濟夫仁者非以示厲也彼冤
者釋而暴者伏其辜皆仁之用而謂刑官少仁何哉刑

官少仁固繫其人而豈先王制刑之意哉若楊君為刑
官中外十餘年所全活既衆而又進退以之亦求不失
其本心而已然壽終名完而有子世其業將充拓而光
敷之利孰甚焉吾思世之論刑官者急于仁以為利而
弗之省也故為之立傳君以弘治甲寅八月十六日卒
年七十有三子六人孟琦陝西華陰縣丞孟瑛舉進士
為刑部主事其言議操履有父風孟琳陰陽學訓術孟

瓊孟瑤孟瑜

徐處士傳

處士德賢字孟明姓徐氏蘇州常熟人其先所居曰邵舍墅曾祖程元海道萬戶祖恢祖又遷漁梁至正末嘗集鄉兵捍閭里里人賴之別號春軒工草書父舉生三子處士其季也處士生即秀穎不與凡子伍卅角入鄉塾日誦千言自經史百氏書率能通大義又以餘力通陰陽醫卜之學稍長從三山陳元圭專受春秋將卒業而天兵下姑蘇乃挈家避難邑城事大父母父母愈力

涉險茹辛凡數年大父母父母相繼去世亦不敢以客喪廢禮既而常熟失守復徙郡城雖顛沛中所與遊必一時名士吳元年始還漁梁顧兵燹後業以中圯處士恒心語以亢宗為志計日規措不遺餘力務使燬者完逋者復敝者新門閥再興而自處泊如也時鄉先正思菴吳公猶未有名處士首禮而友之文廟靖難初郡邑洶洶無錫莫氏黨裔有乘時剽劫者或謀于處士處士力沮之曰我輩非有官守第率子姪保田廬以俟命可

也其高識遠慮一時老成人皆莫之及永樂中悉以家
政付子訥曰吾老可休矣自結廬于所居西偏榜曰靜
菴菴有山石花竹之勝處士日徜徉其中客至淪茗嘯
歌竟日忘倦歲丙申十二月二十有五卒之前二
日呼訥曰吾平生無過人處惟肯改過喜濟人取予之
間不敢悖義持是以終吾身猶懼弗克汝能體此心以
不忘先訓上師古人吾目瞑矣言訖沐浴安寢明日又
召兄子言保族宜家之道亶亶不少亂及晡而逝享年

七十有三配鄒氏有婦德佐處士起家姻鄒稱之一子
即訥一女適錢慈有孫八人愼愷悌懷忤懌悌悌正
統丁卯鄉進士歷古田長寧知縣恪成化丙戌進士歷
工科給事中湖廣左參議河南右參政左右布政使今
都察院右副都御史奉勅巡撫河南女孫三人適錢悅
者以節聞詔旌其門曾孫二十有一人綿純統綬紀縉
維綰繼績緯縝組緹練綰緇縝統緝緇綬成化乙酉鄉
進士歷石首永城上杭知縣玄孫四十有二人璠瑞璫

琨瑕璚璣璨珙琥瑤瓏瑚琏玼環瑯琢琿琳璫瓌餘
多未名者自孫以下用發廩賑飢授義官者五人為儒
學生者三人處士墓在南沙鄉敬真里漁梁溪北之源
於是葬七十有六年矣弘治甲寅以恪上績恩制贈處
士通議大夫都察院右副都御史褒寵有加

論曰儒先謂天報善人之後莫大于賢不肖而世乃以
貧富貴賤為言舛矣若徐處士者以眇然一儒生經世
亂而不棄其身於他業不狎其身於非友不汙其身於

狂僭可謂有君子之行矣要之際興運而中起其家子
孫曾玄積久彌盛至六七百指其間出而顯者為名卿
次者為良吏處者為義士而女之有歸者為貞媛謂非
天之報善人而致其後之多賢若此哉況貽封之峻廟
祀之豐而富貴兼之者哉處士子都憲予同榜進士嘗
竊聞履善之祥故輒為立傳然書處士而不以贈銜繫
之者重其德不以爵用比于漢徐君之例云爾

前鄭州守洪公傳

公諱寬字有約姓洪氏世居徽之歙縣之永揚里其先
曰龍圖閣待制贈少師中孚顯于宋族大以蕃人姓其
地曰洪源公曾大父楚善大父宋顯父懷徐母江氏其
德善之詳並見公所編洪氏世譜公生九歲即選補府
學生治載記淳實淵穎不妄言笑人咸器之以景泰庚
午領應天府鄉薦屢試禮部辭乙榜卒業太學遂以成
化丙戌入吏部銓授湖廣桂陽知州州當猗獠破劫之
餘公為勦驛堠作市區禁侵暴勸分備荒民漸復業桂

陽古府治有縣附郭國初以州治縣以府治為倉民弗便公言于朝請復州治經畫規措不數月告完而民不擾方迎父就養居一年以憂還辛卯服闋改河南鄭州時初藩府于汝寧濬漕河於黑陽山立會府於開封徵夫役千六百餘人使者旁午公懇言州狹民勞免其半癸巳歲大稔奏免三分又請發陳麥一萬石與官粟兼濟庶危急可拯巡撫都憲武進楊公亟善之下其事諸府民賴全活甚衆賈魯涇及白婁河歲病民公築隄捍

之而患息州城壞不治公董葺之成加壯焉汜水古峭
關議者欲革之公言峭即虎牢古險塞時平固無所事
守若卒遇歲飢盜出不測其孰禦之故愚以為不革便
卒存峭關公治鄭久民感服其惠威莫敢犯而鄰境陝
汝諸州訟不決者亦請於公誠下孚迺一新其學宮刻
許文正公大學要略諸書迺諸生又新鄭大夫子產之
廟以風其鄉人州民李慶家蠶簇巨繭成衣襟袖悉具
而民間駒犢多雙生者人以為公德政之應巡撫都憲

江浦張公請旌異之山右原公請以為鄖陽知府命未
下而公以疾解組歸矣公晚歲益端居不入城府合曾
祖而下十六支萃居一門内外有規歲序有燕周卹有
等里人有事亦相與就質焉成化丁未十一月二十六
日卒壽六十有二妻汪氏先六年卒子四人長達克家
不仕次迪禮部司務次遠成化戊戌進士歷知莆田濬
交河三縣有聲今以監察御史莅事南京次通府學生
孫十人長儒次偉次休次伊次俸次儉次价次脩次倣

公墓在清泰里河塘上鳳山之陽

史官曰古循良之臣譽興位隆若西京之世所書者蓋甚衆也洪君治兩州有惠政為聞人而不克究其志以老何哉然有子能世其經拓其顯揚之業而大之人以是知天之報施善人固有在彼不在此者予故取而傳之非直以慰公矣將使夫為善者無懼焉耳矣

汪節婦傳

汪節婦陳氏名鼎徽之祁門人其父曰偉人與同邑汪

仕政皆名士故節婦在室已能受姆教為賢女年十九
聘為仕政子軫妻汪舊族而仕政又振之節婦能事之
盡禮嚴奉其條約舅姑安之曰得婦如此老復何憂哉
其佐軫養父母尤力至於處娣姁供祭燕御佃傭斬斬
有緒人率慶軫軫亦以自慶踰年生男奉以見舅舅大
喜小字之一孫定名曰鐸吾將望其多似續以振吾宗
也再踰年而軫遘疾不起疾革時略無一語及節婦節
婦號慟幾殞者數四有老媪勉之節哀則泣告曰吾夫

屬續之所以不及我者知妾無他也吾何用生為聞者亦為之灑涕既服闋節婦始年二十三舅姑少之微使人相風則大哭曰我何人家女為何人家婦而敢以此相侮哉不當即死以從吾夫于地下爾風者乃不敢復言節婦奉舅姑視夫存時益謹謝膏沐勤女紅日抱其孤兒茹泣曰天乎純鑒此血誠俾苟存視息養吾夫不絕如綫之氣以不墜汪氏吾願畢矣鐸既長勉之力學為之擇配而得方氏女亦善事節婦天順癸未有司以

其節聞覈實如令旌其門迄今弘治癸丑節婦年八十
四有孫五人曰相曰樞曰糖曰朴曰楷樞尤淵穎淳慤
進補儒學生部使者試士嘗占首選然數竒諧寡每不
利于場屋云

史官曰先正有言天報施于人之子孫莫大于賢不肖
而不知者以富貴貧賤寘論舛矣吾觀汪節婦陳之履
行殆有烈丈夫之所難者雖已躋壽年沾恩典疑有未
盡則將于其孫樞乎驗之人亦佇見樞之力學績文當

有以為節婦榮也然予與樞善賢其人有志於道知以程邵為師疑所以榮節婦者將有大焉豈獨富貴哉

鄒氏傳

錫山有華鄒二氏華祖南齊孝子寶鄒祖宋寶文閣學士忠公浩族最盛各以所居名其在近世則鵝湖之華有時葺翁守方守方生文高故儒者所著宋史發揮東鄒集文高子蒙實娶于忠公之族蓋徐塘鄒也其父珮承事郎號撫松大父宗文仕知通道縣兩家雖以產雄

其鄉而維之以禮義他姓不及焉鄒氏者生有至性如成人早喪其母悲哭不止惟見父則更為歡父訝之久乃悟曰吾女孝為恐傷我故不哭耳噫人家那得有十許歲兒能如此耶長益好女紅及喜聽人說古賢女婦事歸蒙即甚得舅姑心姑以內政畀之內政悉辦久之喪其父與舅過哀成疾而治家益勤至手自緝鱸泉以先家人姑慰止之則面遜謝退作如故其佐蒙之大者能教養其兩弱弟晉升晉升每語人曰我兄弟輯睦嫂

有力焉又嘗諫蒙曰君家以積德故至此君宜損己無
多取于人庶有後蒙義其言行之人果譽蒙曰華之良
也然終以舊悲勞致瘁不可起卒時出言謝其姑且戒
蒙而勉其子累百語不亂既絕復曰我實不能舍姑姑
亦大慟曰老不幸而失賢婦吾何用生為則語蒙曰婦
事我十三年年甫三十有一有一子兩女叶成汝家其
葬諸西壽山祖壠之側葬事固無煩我我惟欲得名公
文字為婦不朽庶足以相慰爾蒙退請楊儀曹君謙狀

其事遣人來致毋命予素重儀曹讀其文甚核是足以不朽矣謝再三其所遣人跪曰走數千里而來將何恃以歸報老人其言益可悲也遂序而傳之

論曰劉向為列女傳凡一言一行皆見錄不遺誠憇人喜高節素行而忽婦職之常也若鄒氏之為華婦亦獨能盡其職之常爾然其姑乃思愛之不置是必有當其姑之意者夫能當其姑之意則所以佐其夫主其家者必有道焉嗚呼是亦可謂賢婦也夫抑可謂之孝婦也

夫

華處士傳

處士姓華氏諱正字守正以字行晚號愛菊翁南齊孝子寶之裔也其先曰原泉當宋南渡始居無錫之隆亭六世孫起濱再遷垓陽起濱生璞元晉冀屯田總管璞生鉉功德使司都事早卒妻陳氏以節旌門至今號旌節里鉉生幼武幼武生宗韓復遷鵞湖宗韓生興叔興叔生思濟處士父也處士性孝友早喪父每言及雖遷

豆儋爾即掩懼流涕事母鄒氏務得其歡心有疾輒籲
天求代疾亟走千里禱泰山且沒又復走兩京求金石
文圖所以不死者年七十喪其兄守方盛暑哭奠如禮
因中暑暈醫弗治歲經暑輒發以弟守端早世教育其
諸孤若己子尤厚宗族置義田周貧乏族有譜多舛處
士據舊藏續修之而不敗以己意參焉其慎之也兄子
玳孤不克自立育之成為築室納配呂氏孤女出內之
弟者處士收養之且資裝以嫁華大族有瞰處士病而

以計敘其田若干畝處士覺而歎曰先業所在惡可以弗力言於官十年事白乃歸闢逸老園日徜徉其間久之幡然曰得無啟後人遊宴之漸乎中構觀稼樓貯經史藝桑果課視為適或譏其務逸得勞則笑曰吾志也處士喜讀書尤好胡氏春秋及歷代史見逆理強辨即怒勃然雖親且顯者弗貸至素所不善有善亟稱之弗置也處士與其配呂君伉儷垂老無間言篤朋友死生不相背華故饒于田畝十則歲給無息米斛四佐其鉉

基銓父之費鄉族効之歲凶有券米斛四千聚于庭乞
緩其逋者處士即裂券罷償歡聲載道由是兩子一孫
皆本其志發粟賑饑為義官處士以弘治七年二月七
日卒壽七十九子二人曰祐德孫男二人從智從仁孫
女多適名族其適今監察御史陸完封孺人者德之少
女也曾孫男三人曰金石竹多克家

論曰予與處士還往幾三十年每見益老而平直之行
靖慎之容終始一日也業之豐腴之昌固其先世之所

敷遺然處士善繼述足以近承于盛時而充拓之亦惡可揜哉

蘭州同知封翰林修撰錢君傳

君諱中字用之松江華亭人曾祖實祖復父昌皆不仕而復故儒者尤好子思子之書鄉人目為錢中庸君逮事焉年十六為儒學生以俊警聞嘗假同舍生文字不獲就目一再過即背錄不失一言由是學益博文必務出人上然三試南畿輒不利遂罷去客荆襄江淮間久

之聞陳御史選提學江南躍然歸就試果甄錄之成化
戊子中南畿秋試七上禮部又輒不利乃詣選曹請改
隸南京便養母得歷事工部未滿五日聞母訃或請足
期而後發喪君大慟斥之服闋以祿不及養乞遠郡自
効廷授蘭州同知蘭屬麗江府雲南絕徼也酋羅姓者
世知州木姓者世知府恃姻為奸虐君動以法持之羅
故使督五井鹽課君正色曰我奉命監州豈專為鹽吏
而已羅恚欲挾木中傷之君以詩抵木木反禮君不敢

肆而夷楚悉恃君以安分巡兩司若林副使俊輩皆賢
君檄使稽鄧州軍餉再攝雲南縣又攝黑鹽井提舉司
往來無虛月縣邏卒得賂縱盜以良民充格數歲不決
君辨釋數十人黑井鹽坐潦虧課君至以足告上官驚
歎曰得非連州鍾乳乎歲庚戌委君入賀長至節值子
福舉進士第一君慨然曰是足以成吾志矣遂引疾致
仕君所居後即晉陸機放鶴灘故地作樓其上合林下
人結社號榮壽會口不及官政與郡士大夫飲輒盡醉

浩歌自適或規其放者君曰吾將藉以是全吾真使涉
世故者不吾撓也吾豈真放哉錢之先居嘉興桐鄉相
傳忠懿王後元季君高祖德名避地華亭城西贅薄氏
家焉君既得謝將往桐鄉合族定宗法未行而卒五月
望後四日也得年五十有六君生負氣侶必思以自
見而數竒諧寡終不詘以求合然居家篤行早喪父祖
母陳命傳食仲子及君時仲殷而君困君不可曰是畜
養者之所為爾極力與其妻陸奉陳及母范咸得其歡

陳之喪悉力營葬不以勤仲父君之子益企君之孝福
為翰林修撰三載得推恩封君如其官忽思君心動例
不得歸省則移疾冒暑行至東昌得君訃福弟祚亦舉
于鄉君治命曰葬地毋遠我祖父福等遂遵故壟襄事
其地曰華陽橋蟠龍塘

論曰士之有所立於世者豈獨以其顯有後之為侈哉
觀君于仕階未滿五日發喪事大毋雖居貧無違禮佐
遠州不鄙夷其人而寘禍患于度外非燭理明而逮義

勇者能之乎人率謂君徒以其子故顯名而不知君之所自立亦誠有足書者故予為君傳不示侈焉明古之君子有所立者非全恃乎此也亦將以慰夫人于下地云爾

參政陸公傳

公諱容字文量姓陸氏蘇州崑山人元盛時號周涇陸家曰士明者販遼東值兵興客死子福育姻鄙徐氏因冒其姓福生繼宗繼宗生裕贈兵部武庫貲外郎娶陳

氏生公公妊時母夢紫衣人以笏擊其首曰當生貴子
覺而公生虎厚白皙見者以為英物九歲賦詩有奇語
十六為縣學生大肆力於經史百家至廢寢食而凡擣
蒲博奕之戲一不挂目葉文莊公亟器之曰范文正公
事業不可不勉也舉成化丙戌進士第除南京吏部驗
封主事始請于朝復姓陸氏丁父憂服闋改兵部職方
會敵入邊遣將北征勅公紀功軍中敵退而還進武庫
員外郎大臣患京城多盜請遣給事中御史部屬官五

十人大索以公總其事公極陳不可事果中格尋進職
方郎中時邊報旁午封事日或四三上凡敵情虛實地
里險易兵力分合皆犁然中其肯綮事下三邊邊人驚
服大抵皆出公手而於沮征安南及罷勦鹽賊劉通兩
事尤偉有昌佐者京營都指揮故降將也求參將雲南
一巨璫傳上意令兵部上其名甚急公持不可則召至
左順門諭之公曰既出上意命下即是焉用舉為且金
齒騰衝外控諸裔要地也佐材力庸下且降將不可用

若今日阿旨異日壞事雖禍及身家何益巨璫語塞事
乃已他如韋瑛之誅定捕妖言功不得世襲皆自公發
之未幾丁母憂服闋上疏言太倉兵衛不便者八事從
之所司復采其尤切要者行天下為著令除武選郎中
值今上初即位斥戮倖進庶政一新而太監李良典御
廐為都指揮王欽梁宏乞陞都督得旨矣公上疏極論
都督武官極品體勢甚重不宜授無功及非人而良等
招權恃恩當正典刑仍乞立法以禁將來疏兩上奪其

新命士論壯之復上疏論八事曰儲養台輔曰教導勲
戚曰愛惜人才曰久任巡撫曰經理京衛曰選練禁兵
曰均平鈔法曰慎重會議而儲養台輔愛惜人才二事
尤剴切時柄臣疑公侵官且臺諫力為之排逐異己者
懼公言動上將陰中之尚書余公為言吏部得出為浙
江右參政距上疏一月爾公至任復條例兩浙不便者
八事多見采納於潛民陳乙夫婦乞食夜投宿桐廬山
中漁家被殺瘞之而婦不死覺有人蹴其脅曰明星至

矣何不走訴婦自墓隙出遇公長號稱冤盡得其狀漁
者論死蘭溪章憲僉懋作頌美之辛亥聖節入賀復上
疏論漕渠利病不報癸丑大朝罷官者若干人而公亦
與焉聞者大駭公處之怡然且賦詩道別既歸於所居
作成趣菴獨笑亭日緇衣野服著書其間又改作先祠
落成已屬疾猶強起獻拜如禮以甲寅七月戊申卒得
年五十有九公少即有志經濟如典禮兵刑漕運水利
之類罔不究極其本末利害手書之冊為施用之具識

者以為百不一試也居家孝友父為人所誣坐謫戍連
者二十四人公陳書上官雪之奠母之日塚上廬次及
城中屋宇烏鳥飛集萬數鄉人嗟異公子未蕃夫人張
氏數勸買妾公曰吾祖宗以來無畜妾者不可所著詩
文曰式齋稿浙藩稿歸田稿奏議在朝曰式齋筆記在
浙曰封事錄記事之書曰菽園襍記式齋邇察太倉志
別有兵署錄水利集問官錄總若干卷子一人曰伸舉
于鄉嗜問學有行檢克紹其業

論曰公當弘治初伏闕上疏時予方以言者去國道中
得其稿讀而歎曰偉哉賈陸之緒論予然亦未始必其
終獲遇也既乃聞其以論薦而出有微意焉盖出未久
而罷且死矣道喪風靡士自晦則笑以為無所取材而
擯之稍露一二則又恐其得譽望有進用之漸必誣之
使去則以為快足豈獨後世哉若擯于一時而顯于既
沒誣于小人而白于君子固天定也士獨求其無愧而
已公雖用不究所學然有建白在朝廷有惠澤在民有

著述在學者足以考見矣遇不遇奚病焉

全景明先生傳

全先生寅字景明西安邑人少聰警失明無所事事
乃受易師學悉究義經畫卦之旨而以京房斷占多奇
中正統間父清遊雲中挾景明與俱三邊吏士有問身
休戚及軍利鈍成敗必就景明決之由是全先生之名
聞四方己巳秋敵將額森大入邊英廟北狩陰遣使命
鎮守中貴人裴當問景明景明筮得乾之初九附奏曰

庚午歲仲秋車駕當還還後七八年必復辟英廟心識
之時忠國公石亨以參將守雲中賢景明引為上賓動
必咨之暨景帝嗣位敵益熾召亨還總京營亨以請有
幹略薦以自輔景明因侍行至京時額森復入寇京師
戒嚴亨召景明問計景明筮之曰無能為也且彼氣已
驕戰之必克敵果敗去庚午額森欲奉英廟北還時率
以為詐獨武寧伯朱謙上書懇請朝廷持不敢發景明
力言於亨曰敵人順天舉義我中國返失迎奉之禮獨

不為外國笑乎亨遂與少保于公協議遣使敵果奉乘
輿來歸實庚午秋也英廟以太上皇居南宮三年錦衣
指揮盧忠上變外議洵洵忠一日屏人請筮景明以大
義叱之曰是兆大凶死不足贖忠懼而佯狂為風狀兩
宮乃安忠後伏誅如景明言景帝之弗豫也中外以儲
嗣未定為憂景明亟言于亨曰公國柱石當委身致命
以安宗社今危疑之際不早定大計禍且不測亨意遂
決英廟復辟將官景明景明固辭乃命工范金鑄陰陽

神靈四字為筮錢十八文製象牙盒貯之以賜又賜魚
牙金酒盃一白金彩幣若干會清以指揮僉事將出莅
徐州上曰全寅得毋偕往乎其授錦衣衛百戶在京居
住景明復固辭不允景明見亨寵位已極每因筮以持
滿之道反覆戒之弗納卒及于禍景明當景泰天順間
名公卿大夫無不延接者然一語不及私事惟抑邪與
正濟顛扶危可致力則諄諄不少回避遇古今圖史及
異書必令人傍誦聽之至老不倦又緣名字之義自號

啟陽今八十有六歲尚康強無恙三子長鑾以材武自見官錦衣衛百戶次鑒治易為進士業次銳以善書士隸中書舍人

論曰昔嚴君平卜筮與人子言依于孝與人弟言依于順與人臣言依于忠各因勢導之以善蓋賢而隱于卜肆者也若全景明先生固聞君平之風而有慕焉者歟其禮于名流不浼于權貴壽而有子老于聖世非倖也彼司馬季主不見知于宋忠賈誼郭景純不免于王敦

之難其術精矣而其所得又景明之所不滿者歟

汪義士傳

汪義士中和字貴民唐越國公華之後休寧西門人曾祖養晦自西門遷汭口祖明德父亨義士為人頽然廣額性介特寡言笑每讀書至古忠孝節義事即掩卷太息曰為男子而泯忍以度世亦惡用生為鄉先生聞而異之曰汪氏有子矣義士家有尺籍在貴州適當亨亨還自軍道其艱苦義士未冠也恒戚戚不樂宣德丙午詔

簡汰諸路兵亨弟兄皆以老謝行義士毅然躡屩往代鄉人壯之貴州帥聞其故儒者率遣子從學義士因以其暇日為講說前史名將所為如何及近世養兵禦侮之要邊臣聽之無不慰愜或戎務弛張夷情虛實山川道里險易通塞有所咨訪因而舉錯甚多義士一再以公務還汉口省其父羣從兄弟悉長健衆議當番代以均勞者群從又相持不前義士恐傷之復抵戍則髮漸種種矣貴州古夜郎越雋地山水荒寒中土人非謫配

罕至義士獨往遊其間歌笑懷古人莫識也都勻苗寇
作貴州軍禦之失利義士所居堡僅百人欲散走義士
仗劒叱之曰當此際不叶力堅守即國家養我輩何用
况分地不可擅去有大僂乎衆志始定入夜備稍解寇
突入有牽義士急去者義士慨然曰士死義爾堅立不
動且詈寇曰朝廷何負于爾敢猖獗若此遂被害正統
十四年七月二十四日也得年五十有九少子南雲被
虜月餘哀慕動寇寇不忍殺釋而歸之義士二子長義

方次南雲也孫男三觀成昕觀早喪昕篤志力學為里塾師

史官曰郎之戰公孫禺人遇負杖入保者息而謂之曰使之雖病也任之雖重也君子不能為謀士弗能死不可也與其鄰童汪錡往皆死焉孔子稱其能執干戈以衛社稷嗚呼若義士之死固可與錡相望于百世之上矣而封疆之臣乃無畫策捐軀若公叔者不重可歎哉

鄒佑之傳

鄒佑之無錫人宋寶謨閣學士忠公十一世族孫也所
居曰華莊再遷龍涇至元季而業中圯佑之曾大父伯
惟大父洪昭父以善歷三世始漸復舊以善娶于華生
五子皆有聞佑之其次子也性孝友於二親生盡養沒
盡哀與諸弟甚篤一弟早死撫其孤如己子其讀書知
要嘗誦武侯靜以修身語說之因取靜修名室以自警
平生不急利而家益足其志在寡取或因其乏而并捐
之故多不忍負之者長區賦取給公上而已處家有規

與其配華肅雍睦相成教三子或力家或業儒無敢肆
以譁者闢所居東原為新甲第于其里以時修忠公及
上世丘壠無論䟽戚輯宗譜助刻縣志造鰲塔諸橋浚
香渠以利濟鄉人雖捐重費不愆所還往若武功伯徐
公太宰思軒王公憲副援園劉公皆一時名卿遇佳勝
處同載並遊觀者嘖嘖佑之晚歲深以盈滿為愆號其
堂曰戒得不欲闕世事作假山堂後畜古法書名畫于
中又樓其南曰學閒終日手一編不置弘治戊午春忽

遘疾以四月二十有二日不起實始生之辰也君子謂庶幾古所謂全歸者佑之每歲出貸米取息值大歟有調之者曰貸不倍貸乎謝曰乘時射利先世所不為也姪婦錢嫻而無子請後以佑之孫不可曰渠自有同氣在徇之是利之也錢訴于郡郡名問故驚羨不已此二事人尤稱之佑之諱賢卒年六十有八嘗以歲飢輸粟例得官然非其志也子曰愚承事郎曰魯早世曰鈍儒學生孫五人

論曰無錫為毘陵之望予恒過之見其山水秀明鍾之人宜多賢者而鄒公先號知名士或顯或晦不可縷數子孫出而嗣其休祉遺烈者未有極焉豈其所鍾者獨盛哉亦有所觀法而然哉若佑之所樹立美矣鄉人為紀其行累千數百言大抵多富好禮者之常予因節之為傳非不詳也得其大則小者可知也

封監察御史王公傳

公諱宗吉字天祐王姓世居蘇之吳江為碩宗所居邑

西附郭梅里曰壽之者元季聞天兵將有事于張士誠計大軍必自太湖登岥道梅里以入遂避地仙里而舊業果毀于兵燹壽之生良輔良輔生彥徵彥徵生守仁勇于義守仁生公未三歲而卒再期而母吳亦卒撫于諸母公雖孑然在疚而負穎質性聰穎鄉先生吳善與守仁交莫逆間撫公異之曰吾無以報亡友顧孺子可教也收誨之公讀書過目不忘家故有春秋左傳朱子綱目尤愛玩忘寢食弱冠學成即授徒里中嚴條約如


老師學徒日衆公念其先業中微思所以拓之者勤儉自樹不遺餘力而未嘗取非義之利家寢以饒盡復其舊產以終父志所居之堂曰樂善為石梁七鑿義井四貧乏病死者食粥施衣予藥給槥恒恐弗及成化改元歲飢焚逋券數千辛丑再飢出賑米六百斛巡撫都憲王公承制授七品散官辭不可鄉射禮行郡邑大夫必以賓禮之有疑政多就問焉公處家庭甚肅分命諸子理家政治儒業僮僕各職其職而不敢肆奉先禮賓及

冠婚慶吊式禮給適中覽名所居曰遺安曰百忍樓曰
懷恩又創月湖蓮陂別墅于松江太湖上開圃于所居
東池曰涵虛亭曰可怡橋曰凌雲谷曰賓而時與朋友
詠歌其間弘治丁巳以子貴勅封文林郎江西道監察
御史人以為績學累善之報公疾革時處分家事不亂
且召親友與訣命遷正寢而終寔弘治十年十月四日
壽七十三先是公卜壽藏于王山之陽山擁水環境甚
佳勝公心安之督治衣衾棺槨皆倣古制至是葬焉娶

于氏先卒子男二皆夭繼沈氏子男四曰賢義官曰哲
弘治庚戌進士授監察御史嘗奉勅按閩中又按廣東
皆有聲曰明國子生曰敏女三長適郁摺次適徐質俱
庠生又次適朱佩孫男五曰恩邑庠生曰懋曰京曰東
曰惠孫女七曾孫男一曰檜

論曰吾聞其鄉人公嘗戒諸子曰兒輩處世勿急急名
利與其過取以賈怨致禍孰若省費以安己濟人見二
子不第歸指壁懸蠶種示曰此物非時一幅紙耳當春

則皆化生而為用世之物蓋各有時也論仕宦則曰汝輩他日遇時致用慎勿以刑立威以偏斷事以利喪守以死易節若不能痛戒雖弗仕可也又曰人之處世凡百成敗皆有天命吾老矣平生經歷雖小事未有不由天成慎勿患得失而喪名檢又曰吾嘗慕古之豪傑越千載其名如生汝輩須立志以古人自期待其言皆足補世教殆非今之士也傳所稱逸民禮所稱鄉先生沒而祭于社若王公非其人歟



篁墩文集卷五十

欽定四庫全書

集部

篁墩文集卷五十一

詳校官編修_臣李堯棟

中書_臣劉源溥覆勘

總校官進士_臣朱鈐

校對官監丞_臣張魯炳

膳錄監生_臣李金玉

欽定四庫全書

篁墩文集卷五十一

明程敏政撰

祭告文

補漢昭烈皇帝伐孫權告廟文

嗣皇帝臣備敢昭告于太祖高皇帝世祖光武皇帝孝
愍皇帝七廟神靈臣備聞葛伯助桀為虐成湯先征之
而後放桀紂君黨紂為惡武王先戡之而後伐紂勢有
緩急動不可以後時理有經權事宜從乎中制伏以逆

臣孫權乘時多難竊據江東尚以世受國恩同獎王室
首遣使者作為盟書繼進家人求通戚畹輶車來往屢
修信睦之儀疆界分明薄無彼此之隙日者將軍關侯
進討國賊既下襄樊為權者不思掎角之圖乃作反噬
之計遣賊將呂蒙等掩襲我荆上殺戮我戍士臣某則
委身國事伏節虜廷而逆權甘作叛臣不復尊周是念
顯受偽命方以吠堯為功穹壤不容人神共憤臣聞祖
宗之法不道者必誅春秋之書無將者罔赦敢附湯武

之義先興黎葛之師尚賴宗社之靈天地之祐庶成大業克濟中興臣備將以章武元年九月二日親率六軍恭行天罰以丞相諸葛亮輔皇太子留守成都以車騎將軍張飛出閬中虎牙將軍趙雲出江州建威將軍黃權出江北侍中馬良出武陵五溪諸蠻罔不率俾將軍向寵等各率所部擐甲以從誓梟叛賊之頭少示偕王之警即圖大舉掃定中原祇奉寢園告謝天下臣備臨師不勝戰懼之至

祭婦翁大學士李文達公文

維成化三年歲次丁亥正月戊辰朔越八日乙亥壻翰林院編修程敏政謹以牲醴之儀泣奠于少保尚書大學士贈太師文達公尊丈之靈座前曰嗚呼政生十齡粗守庭訓誤蒙召命遠赴京師惟時我公實司帝制命題試我喜溢長眉親教詩書正其句讀動止語默罔不容心迨及壯年遂妻以子奈何遐棄失我依歸屬纊之前遺書見屬政愚不肖此任曷堪惟當竭心以還治命

但所恨者生不能侍藥左右歿不得執紼塋園薄奠載
陳有淚如雨尊魂如在鑒此哀誠嗚呼哀哉尚享

祭妻母夫人周氏文

維成化四年歲次戊子四月庚寅朔越七日丙申壻翰
林院編修程敏政恭備菲儀馳祭于外母封一品夫人
周氏之靈曰嗚呼政自髫齒受知太師教育兼隆載妻
以子夫人之意惟公是同遜意太師中道而殞夫人繼
逝同此玄堂訃音遠聞中腸寸裂二孤未室孑然誰依

蒼天悠悠此慟何極緘辭千里致我微衷臨風馳情靈
兮來格嗚呼哀哉尚饗

闕院祭大學士彭文憲公文

惟公質清以介學正而充魁甲榜于壯年士服其望登
延閣于嗣歲世慶其逢當睿皇復辟之初再受知于丹
宸暨今上正位之始首入侍于青宮有康濟生民之志
有不振士氣之功有懔然不奪之孝有確乎不易之忠
人方仰勲猷之大著天胡俾耆俊之遽凶史垂成而未

上親備養而難終訃音上徹愍策加隆節名二惠進秩
三公蓋以篤哀榮之令典重台鼎之儒宗也某等晚生
孤陋素欽德容渺塵遊之已遠悵晉見之無從尊酒既
泐殂肴既豐公乎如在假此敬恭

奉遷五世祖考妣祭告先祠文

維成化十三年歲在丁酉春三月戊辰朔六日癸酉考
玄孫翰林院侍諱敏政敢昭告于顯高祖考耆宿處士
府君顯高祖妣孺人吳氏顯曾祖考徵士贈兵部尚書

兼大理寺卿府君顯曾祖妣贈夫人汪氏顯祖考處士
贈兵部尚書兼大理寺卿府君顯祖妣封太淑人贈夫
人張氏曰仰惟先德蔭我後人使皆竊有祿位以得奉
其時祀顧敏政之父實維宗子自乙未之歲得請還鄉
治疾于茲三年敏政愚昧不能以時上告代供常事儀
文疏略神不顧享五世顯祖考妣非敏政所得祀歲時
饋饗徼福不經又自祖父以來伯叔無後與殤子之當
祀者俱不及脩食之列考之禮典亦或為厲用是敏政

之子六十以今歲二月以來始生丹毒幸已痊可繼發
瘍疹自面及身日夜靡寧醫藥罔効是實敏政之罪下
逮兒身茲涓吉辰謹奉遷五世顯祖考妣以從每歲立
春之祀以叔祖以下諸無後者暨諸殤子殤女逐位祔
食惟我先靈軫此一脉胄系攸關異日將有奉祀之責
特垂陰祐俾遂安全不勝懽切籲叩之至恭率新婦待
罪家庭謹告

奉安顯祖尚書府君遺像告文

維成化十三年歲次丁酉十一月甲子朔二十七日庚寅孝孫左春坊左諭德敏政敢昭告于顯祖考贈尚書大卿府君曰惟藐孫之生未周兩月不幸府君奄棄于家迄今三十有一年娶妻生子日遠日忘緬想德容形諸夢寐謹令人拜迎遺像至京涓此吉辰奉安寓所仰惟陰靈時垂陰祐俾我後人永有依歸不勝瞻戀之至謹告

祭亡弟克寬文

維成化十四年歲次戊戌冬十月己丑朔十五日癸卯
兄克勤嫂李氏暨姪男姪女以牲醴之奠祭告于亡弟
克寬之靈曰嗚呼痛哉吾弟胡為而遂至于死邪使二
親不得慈其子二兄不得友其弟功名無成父子何恃
嗚呼痛哉京居東偏昔所同處豈知一別遽成終古吾
弟之魂其猶戀戀于此乎臨風一觴有泪如雨嗚呼痛
哉尚享

賜假還河間掃墓告文

維成化十四年歲次戊戌十一月戊午朔二日己酉孝
曾孫左春坊左諭德敏政敢昭告于顯曾祖考贈兵部
尚書兼大理寺卿府君顯曾祖妣贈夫人汪氏顯祖考
贈兵部尚書兼大理寺卿府君顯祖妣贈夫人張氏叔
祖考處士府君墓下曰繄惟藐孫至愚不肖承乏講筵
兼輔青宮館閣迴翔十有四載不獲以時修奉先塋終
歲思之不遑寧處茲者蒙恩給驛而來敢用牲醴薦其
常事載惟綸命式遄其歸即以明晨馳還故郡不遠千

里省慰二親桑梓在瞻豈勝依戀仰冀尊靈陰相其行
俾我後人弗至失所庶圖久大以光前聞尚享

南山菴祭亡弟克寬文

維成化十四年歲次戊戌十一月戊午朔二十九日丙
戌兄敏政祭告于亡弟克寬三舍之靈曰嗚呼痛哉汝
真死耶我居京師離親八年所恃以奉養者以有兩弟
在而汝遽忍捐其父兄遽忍棄其妻子邪今我蒙恩給
驛南還以慰二親以與汝訣悠悠天地此恨何窮臨棺

長號汝尚能知我之來乎否邪嗚呼痛哉尚享

祭槐塘族兄克和貳守文

嗚呼程氏雅有宗盟麗澤交孚惟我與兄二十餘年始
終一誠弟叨近侍兄貳專城方期中道少遂平生胡遽
茲厲卒老于行有賢嗣業有良政聲嗚呼我兄雖死而
榮茲因謁告來自神京敢用香幣敬奠于楹靈兮不昧
鑒此哀情

卹典命下奠告几筵文

維成化十五年歲次己亥冬十二月壬子朔孤子左春坊左諭德敏政敢昭告于顯考資德大夫正治上卿南京兵部尚書兼大理寺卿府君茲者有司以顯考訃聞荷蒙皇上卹念舊臣特贈太子少保諡曰襄毅賜祭賜葬一如典禮慟惟先烈有此光榮祇奉恩綸不勝摧咽謹告

吳山陰侯賀公廟告文

維成化十六年歲次庚子三月辛巳朔二十六日丙午

孤子左春坊左諭德程敏政謹遣家人程泉敢昭告于
淳安縣勅祀吳新都太守山陰侯賀公廟下曰孤不孝
罪重上累先公解官而南夜以繼日忽遭靈雨水發灘
危塊坐一舟臂不能奮鄉闕在目膏火貯心惟神遺愛
所敷夙著徽土一夫失所匪神之安幸闡威靈閔茲斃
獨潛消陰沴大啟陽明俾孤早奉几筵用伸哀悃荷神
休庇沒齒難忘瞻望廟廷血隨涕實

至家告几筵文

維成化十六年歲次庚子春三月辛巳朔三十日庚戌
孤子左春坊左諭德敏政敢昭告于顯考尚書少保襄
毅公府君靈座前曰孤不孝之罪上通于天不自死亡
覺鍾先考茲者得請解官奔喪以獲祇奉几筵委頓之
餘攀號無逮俯伏奠告伏惟鑒之

奉誌奠章告几筵文

維成化十六年歲次庚子夏四月辛亥朔孤子左春坊
左諭德敏政敢昭告于顯考尚書少保襄毅公府君靈

座前曰慟惟顯考訃聞于朝上自九重下及多士追思
耆舊罔不盡傷除朝廷特勅詞臣撰文遠遣守臣諭祭
自循藝典不敢瀆陳其餘奠章五府及勲戚大臣太子
太傅英國公張懋等一道內閣及翰林國子儒臣太子
太保吏部尚書兼謹身殿大學士萬安等一道大部及
臺寺大臣太子太保兼吏部尚書尹旻等一道顯考舊
同寅太子太保襄城侯李瑾一道舊將署都督僉事李
景一道鄉人吏科給事中王瑞等一道各部司屬刑部

郎中過璘等一道十三道監察御史吳文元等一道親
家通政使司右參議趙昂一道山東按察司副使李讓
一道致仕指揮同知凌錦一道孤子之同僚同年友左
春坊左庶子劉健右春坊右諭德陸簡等一道并孤原
請太子少保戶部尚書兼文淵閣大學士劉珝所撰顯
考墓誌銘一道謹奉告于几筵伏惟尊靈尚明鑒之不
孝孤無任摧裂之至

諭祭遷主告文

維成化十六年歲次庚子夏四月辛亥朔初七日丁巳
孤子左春坊左諭德敏政敢昭告于顯考尚書少保襄
毅公府君曰茲者有司遣吏來言將以明日奉詔諭祭
于家禮當奉遷靈座于堂中西隅東向不孝孤等無任
哀慟之至謹告

祔葬告亡弟文

維成化十六年歲次庚子七月己卯朔二十三日辛丑
長兄次兄以清酌庶果告于亡弟克寬之靈惟爾蒙葬

僧房歲月滋久一念至此寢食不寧今將以茲月二十四日奉寔顯考尚書少保襄毅公府君于南山之原啟爾之殯祔葬前山爾魂有知鑒我哀疚

祔主告亡弟文

慟惟亡弟克寬之喪倏逾大祥始克從葬于顯考贈太子少保襄毅公墓下惟茲神主理宜祔于顯祖考贈兵部尚書兼大理寺卿府君顯祖妣贈夫人張氏以從歲時之祭謹告

告先世祖忠壯公廟文

維成化十六年歲次庚子八月戊申朔二十六日癸酉
遠孫左春坊左諭德敏政敢昭告于遠祖陳鎮西將軍
開府儀同三司忠壯公廟下曰惟靈勲德著于前史陰
功被于一方況在雲初悉出蔭下感恩圖報其何能忘
向者敏政宦處京師于丁酉年十二月十七日寅時獲
生次子書報于家我先考兵部尚書贈太子少保襄毅
公請命先祠寄名祖保餘澤所庇于今四齡新婦李氏

為此發心特製絳紗袍一領用表孝誠謹涓吉辰遵毋
氏之命稽顙拜獻伏惟尊靈尚歆鑒之佑我後人永保
終吉無任緬仰追慕之至謹告

重作家廟奉安神主告文

維成化十六年歲次庚子九月戊寅朔六日癸未孤子
左春坊左諭德敏政敢昭告于顯考尚書少保襄毅公
府君曰慟惟顯考捐館之秋適不幸有回祿之變治命
改作祠堂于正寢之東惟時不肖遠仕京師不及預聞

惟弟敏德克承先志以其年冬撤而新之用還治命併作祭器神用顧歆邇者敏政賴祖考之靈不即死亡獲襄大事復稽之禮書更作新主奠安其中載念亡弟敏行禪事亦在茲辰兩小女孫禮當釋去重服以從輕服惟敏政不孝不友以重茲厲伏告几筵無任摧裂

奉安五祀諸神告文

維成化十六年歲次庚子九月戊寅朔五日壬午奉訓大夫左春坊左諭德程敏政敢昭告于司命之神司竈

之神司門之神中雷之神族厲之神謀氏之神漢壽亭
侯關忠義公之神遠祖陳將軍忠壯公之神唐歙州總
管越國汪公之神御史中丞贈揚州大都督張公之神
曰惟我顯考尚書少保襄毅公治命作堂于先祠之東
式遵典禮以奉五祀又以義起爰及衆神於惟衆神或
孝友專主于脩嗣或忠義可法乎臣僚或積功累仁慶
延一族或禦災捍患澤被一鄉皆我先公平日所尊禮
而景慕者予小子其何敢不嗣敬之謹涓吉辰行奉安

之禮伏願明靈保我安居佑我家衆永永無虞惟神是
賴謹告

小祥告文

維成化十六年歲次庚子九月戊寅朔二十七日甲辰
孤子左春坊左諭德敏政敢昭告于顯考尚書少保襄
毅公府君曰日月不居小祥奄及夙興夜處哀慕不寧
敢用剛鬣采毛粢盛醴齊薦其常事介子諸孫釋衰易
練上遵禮制弗敢過情惟敏政不孝遠仕京師以奉訃

之日為始斬焉以俟終其餘日伏告几筵不勝感愴之至

祭從祖母曹氏孺人文

維成化十六年歲次庚子冬十一月丁丑朔二十二日
戊戌從孫左春坊左諭德敏政太學生敏德謹以柔毛
剛鬣清酌庶羞之奠致祭于從祖母曹氏孺人之靈曰
惟靈德容莊嚴性資高介姆教宜乎室家頌聲均于內
外敦相夫之義既克配以無慙任起家之勞亦祇勤而

不急遂能中歲見子女之成暮年享身名之泰蓋一家
之老者淪謝惟孺人之為尊少者顓蒙惟孺人之是賴
正宜抱節如晚菊之馨樂壽比喬松之耐何未嬰疾疢
于三時早已委世塵于一芥使聞之者不覺走問狀而
吞聲入憑棺而永嘸也敏政等爰當宦學之歸嘗預起
居之拜雖含飴之末由亦鍾情之有在屬茲發引之期
難及音容之再謹致奠于几筵猶疑聞乎馨歆魂兮來
歆攀號莫逮嗚呼哀哉尚享

赴京謝恩告文

維成化十六年歲次庚子冬十一月丁丑朔二十四日
庚子孤子左春坊左諭德敏政敢昭告于顯考尚書少
保襄毅公府君曰惟聖天子不忘舊臣遣使賜祭者再
凡百葬事悉從官給哀榮之典告厥成功禮當恭詣闕
庭拜謝聖恩將以來日就道惟是天寒歲暮遠遶几筵
尚賴尊慈扶顛持危俾不孝孤早達京師成禮而還無
任感愴之至

元日設主告文

維成化十七年歲次辛丑春正月丙子朔孤子左春坊
左諭德敏政敢昭告于顯考尚書少保襄毅公府君曰
惟不肖孤道出淮陰守凍于舅氏之館伏遇歲事更新
不勝感愴謹用設主告奠仰惟尊靈尚鑒享之

過河間告祭先塋文

維成化十七年歲次辛丑三月乙亥朔初六日庚辰孝
曾孫左春坊左諭德敏政敢昭告于顯曾祖考贈兵部

尚書兼大理寺卿府君顯曾祖妣贈夫人汪氏顯祖考
贈兵部尚書兼大理寺卿府君顯祖妣贈夫人張氏顯
叔祖考處士府君金沙嶺墓下曰惟眇孫以顯考贈太
子少保襄毅公府君于故鄉南山之原賜葬禮成謝恩
赴闕道出青縣沂河而南瞻望先塋僅逾百里謹用登
陸祭告而行伏惟尊靈尚垂鑒祐不勝哀慕之至謹告

男壘授官告文

維成化十七年歲次辛丑五月乙亥朔十五日己丑孤

子左春坊左諭德敏政敢昭告于顯考尚書少保襄毅公府君曰嗚呼惟我顯考祇事列聖幾四十年出入中外十有三任累典征伐克有茂勲口不言功至于沒世惟不孝孤深懼先烈失墜無以明示後來輒以哀情上塵天聽荷蒙皇上篤念舊臣特降綸音錄用長孫壘為錦衣衛世襲百戶世奉顯考之祀聖恩覆被門閭增輝仰惟君父之德天高地厚嗟我小子其何能堪一惟訓迪後人竭忠勉孝以圖無負聖恩無玷先烈庶足慰我

顯考於地下哀慕之至不知所云謹告

祭衍聖公太夫人王氏文

維成化十七年歲次辛丑秋七月甲戌朔某日戚生左
春坊左諭德程敏政尚寶司少卿李璋錦衣衛百戶李
玠謹以牲醴香帛之儀致祭于衍聖太夫人王氏之靈
曰嗚呼人孰無歸也莫難于聖門之婦人孰無享也莫
難于聖門之母蓋必置身禮法之場從事詩書之府然
後視內則以無慚于世教分有補惟太夫人性資粹溫

德容清楚視聽率異乎人言動必遵乎古長作配于孔
門遂揚休于東魯下歷執御既克相于大宗上奉烝嘗
每來歆于聖祖中年雖失乎所天兩器迭承分有土懿
此一人允膺多祜鸞封燦爛下黃閣之絲綸鼎食駢蕃
樂高堂之鐘鼓雖老也而不忘主饋之勤雖貴也而不
厭女工之苦何感疾于一朝遽捐養于三釜然几筵吊
祭恩言特遣乎使臣兆域經營卹典載申於繕部體將
合兮幽宮神已遊于玄圃柔嘉之德深劄隧道之碑賢

誥之名益重家傳之譜嗚呼若太夫人者其生固能使
州閭化懿範于家庭之間其歿亦將使草木被榮光于
洙泗之澣也邪敏政等幸叨姻婭之親無復儀形之覩
望闕里兮涕漣思託誠于尊俎遲淑靈兮歸來薦臨風
之鄉杜嗚呼尚享

祭林舅文

維成化十七年歲次辛丑秋七月甲戌朔二十八日辛
丑寓新橋驛孤子左春坊左諭德程敏政謹致牲醴之

儀馳奠于故安東縣簿致仕林公先生尊舅之靈曰嗚呼舅氏何遽去予而長逝乎疇昔之歲舅方輔予於新安託幸終其襄事今茲之春予復拜舅于淮陰則已親乎藥餌冀漸愈于沈疴將益膺乎壽祉嗟離合之無常慨歲月之幾許期間安于瀛城之南詎得計于新橋之涘嗚呼舅氏果遂去予而不起也惟母夫人最鮮兄弟其在舅尊一人而已早升榮于仕途晚歸樂于田里剛介之性雖不足于庸人明敏之才每見稱于先子奈何

官僅止乎一命壽方登于六紀豈天定之未然而福善之難恃乎然全歸無愧于宗祧宦業屢延于肩嗣則天之報施善人固在彼而不在此嗚呼老人之容無復覩之于目長者之言無復接之于耳身遙繫乎他鄉淚徒揮于逝水望故郡之山川感新秋之風雨謹緘詞以告哀惟尊靈兮鑒只嗚呼尚享

代瑩姬祭衍聖公夫人文

維成化十七年歲次辛丑秋八月癸卯朔四日丙午拙

姊程氏婦奔舅之喪舟次臨清謹以牲醴香帛之儀馳奠于亡妹孔夫人之墓曰嗟嗟父母生子四人惟女兄弟尤切情親妹先有歸先生閨閣孰知生離遽成死別庭闈繼殞追痛何言恨不如妹相從九原後予而來先予而往遙望先塋不勝悲愴辦香一炷魯酒一卮臨風灑涕靈其鑒之

大祥告文

維成化十七年歲次辛丑九月壬申朔二十七日戊戌

寓姑蘇驛孤子左春坊左諭德敏政敢昭告于顯考尚
書少保襄毅公府君曰惟顯考棄背奄及大祥而孤以
謝恩南歸留滯於此感愴之至寢處弗寧載念賜塋雖
完碑石未具而石之足以垂久者莫良于吳產乃于驛
舍延禮名流書之刻之並皆如法摹搨封裹多以就工
嗚呼遷主易服之文遂獲愆于禮度昭德傳後之託幸
無憾于私心謹以潔牲粢盛醴齊薦其常事并奉刻完
卹典碑文一通神道碑一通祠堂記一通上告伏惟尊

靈尚明鑒之謹告

謝恩還家告文

維成化十七年歲次辛丑十一月辛未朔孤子左春坊
左諭德敏政敢昭告于顯考尚書少保襄毅公府君曰
不肖孤謝恩赴京道途濡滯以是歲十月二十五日與
妻子抵家適茲大祥餘日方終禮當禫服不勝感愴載
念孤至河間先塋欽差工部郎中郭經一祭歸至濟寧
衍聖公孔宏泰一祭至蘇州知府劉瑀一祭至淞江市

政使閻鐸一祭此皆顯考遺烈在人久久不忘所致謹
以奠章四通附告伏惟鑒之

禪祭告文

惟顯考棄背于今三年禪制有期禮當奉薦載惟不肖
遠仕京師聞訃稽緩負不孝之罪尚有待焉伏告几筵
不勝感愴謹告

代母夫人祭兄文

程氏妹敢昭告于兄長縣簿公之靈茲者長男諭德敏

政謝恩南歸得聞兄長于是歲七月十六日考終承此訃音不勝驚怛謹用酒果奠告嗚呼痛哉

祭告顯考襄毅公文

維成化十八年歲次壬寅春正月庚午朔越三十日己亥孤子左春坊左諭德敏政敢昭告于顯考尚書少保襄毅公府君曰嗚呼不肖孤之服盡今日矣慟惟顯考將使旨于四方孤不能效奔走候起居顯考賜養疾于故鄉孤不能操几杖侍湯藥不幸而大故時方竊祿京

師不能舉棺衾以盡髣髴之禮既幸而襄大事又特拘于文法不能守塋域以供灑掃之役惟顯考鍾愛于孤最深孤之不孝于顯考最重追悔莫逮負罪難逃繼是以還惟當竭心力以養百歲之母隆友敬以保百口之家謹身以求歸全教子以圖繼述昊天罔極言止于斯伏冀尊靈俯垂昭鑒不肖孤無任哀慕之至謹告

修復先塋告文

嗚呼惟我先世塋域在故鄉者自曾大考尚書府君北

遷以來八十餘年守奉弗虔莫能修復寢食靡寧茲者
眇孫過不自量大會宗譜得陪郭宗人所收至正五年
膳塋錄及家藏延祐二年經理保簿稽對字號參考姓
名一一相同如合符節惟始遷祖唐歙州兵馬先鋒使
萬一府君暨祖妣夫人曹氏墓在東皋陪郭宗人經理
無恙十八世祖文一使府君暨九使府君以下墓在東
山十七世祖二教授府君墓在富琅十五世祖大教授
府君祖妣安人余氏十四世祖妣夫人金氏十三世祖

東山居士府君祖妣孺人劉氏十二世祖二處士府君
十一世祖二將仕府君祖妣安人吳氏及萬一上舍府
君以下墓在余頭村程家林十四世祖大團練府君墓
在禾斜條礮塢六世祖大提領府君墓在司徒山蘭絞
坑者俱已勘明悉復其舊惟十六世祖二廸功府君祖
妣安人劉氏及十一使以下墓在十保東山者未有次
緒誓當竭心罄力以圖修奉凡我先墓久而復完非賴
祖考之靈啟廸後人曷能臻此其未獲者尚祈默相用

金溪縣志 卷五十一
底于成庶幾歲時得率子孫少供灑掃之役以逭不孝之罪惟尊靈其鑒之

太師徽國文公闕里告文

維成化十八年歲次壬寅二月庚子朔越十日己酉鄉後學左春坊左諭德程敏政敢昭告于先師宗太師徽國文公先生祠下曰伊川道脉先生之所由傳環溪女宗先生之所自出表復亨之墓而詳其世德嘗有取于程氏之先答成甫之書而勉之進修復有望于程氏之

後惟敏政程氏小子新安一生在家庭獲誦于遺書登仕籍乃塵于誨幄曾無肖似徒切戰兢今茲幸進于門牆始得致恭于桑梓瓣香在御旨酒一陳伏惟明靈祐此愚昧嗚呼泰山喬嶽之容固常目念之如在正心誠意之學願終身誦之弗忘謹告

祭武進致政郎中金公文

維成化十九年歲次癸卯四月丁巳朔越三日乙丑左春坊左諭德侍生新安程敏政北上京師道出毘陵謹

備牲醴之儀致祭于故致政郎中金公先生之靈曰嗚呼先生胡寧止于是邪世經之純宦業之美晚節之完非一世之士邪况授經儲闈執筆太史益昌厥家有賢嗣邪然則先生固無憾矣惜也耆英方事于尋盟壽母遽聞于不起此其心將歎于九原而不能自己邪亦豈非年迫衰暮禮踰哀毀庶幾古人得正而斃者邪如我鰥生最號無似同榜聯官皆後令子契誼之深寧可涯涘憶生之歸省也先生燕勞而禮之甚喜暨生之奔喪

也先生賻弔而恤之備至孰意相違竟隔生死人生幾
何歲月如駛此生所以聞訃失聲而涕不能止也渺渺
綠蕪悠悠江水無從執紼以助襄事敬潔一觴奉奠靈
几嗚呼先生尚知此邪哀哉尚享

清源祭鄉友查以忠文

嗚呼查君衣冠之胄孝義之門有典雅可愛之行有醞
藉可聽之言老櫓蒼蒼其色之健醇醪泛泛其氣之溫
識達古今與讀書者何異酬酢事變雖作官者不倫嗚

呼查君世家徵郡久客清源云胡一疾遽歸其根曾觴
咏之幾許驚歲月之如奔訃傳異域聞者聲吞嗚呼查
君有子克肖有族斯蕃江湖之譽雖晦而尊箕裘之業
雖沒而存櫬將歸於逆旅悲不任兮鄉園某等賓館夙
契友道恒敦或學嬉于共案或誼重于聯昏好月登樓
空誦玄暉之句南風倚棹難招宗玉之魂敬陳薄奠有
淚瀾翻

滄州祭趙氏妹文

成化十九年歲次癸卯夏五月壬辰朔越二十九日庚
申左春坊左諭德程敏政自新安服闋赴京舟次滄州
薄具牲醴之儀同合家眷等致祭于亡妹趙家婦程氏
貞閨之墓曰嗟嗟吾妹胡至于斯淑慎之容莊毅之行
宜膺壽祉光我門楣一旦訃聞舉家悲慟今過墓下旅
況何堪薄奠一觴老稚咸在流水東逝落日西傾靈兮
有知鑒此衷曲嗚呼哀哉尚享

祭崑山陸先生文

諭德鼎
儀之父

惟君崑山之英平原之族行植孔良書香是績韜能弗
售隱終其身悉是庭訓成彼嗣人乃擢魏科乃官禁近
入輔青宮名登位進惟皇覃澤推孝勸忠曰子之顯惟
父之功有赫命恩元士之服有美榮養大夫之祿光增
林壑慶衍孫曾宜膺晚福益介椿齡云胡邁屯一疾不
寤寵擬再班悲生遽訃某等夙因令子館閣同遊悼
此賢父歲月難留肅肅鄉評善人告瘁我我貞珉有道
何愧爰潔牲醴遙盼几筵臨風三奠浮世百年

南京使還過河間告先墓文

維成化二十二年歲次丙午冬十月

關

朔

關

日孝

曾孫左春坊左諭德敏政敢昭告于顯曾祖考贈兵部
尚書兼大理寺卿府君顯曾祖妣贈夫人汪氏顯祖考
贈兵部尚書兼大理寺卿府君顯祖妣贈夫人張氏叔
祖考處士府君墓下曰辛丑之春道出瀛洲銜哀之餘
獲視松楸俯仰于今五易寒暑拜掃弗時不遑寧處竭
承上命校文南畿幸竣公事乘傳南歸有便王程有感

霜露敬止鄉園遂我衷素力孱才薄恒懼弗勝求逭愆尤先達是憑簡書孔嚴即當就道攀戀無由謹此奠告尚享

祭都督董公文

惟公之少也有冠軍之勇有討賊之功其壯也有守邊之略有謀國之忠天胡不畀以松喬之壽茅土之封使十年居于散地而一日返乎幽宮也惟先尚書于公友善勤王之秋實相論薦惟我季父亦公所賓通家之好

遂結姻親疇昔之年賤子奔訃公來慰之不勝哀呼四
更寒暑賤子還朝壽公于堂老氣尤豪曾幾何時遽聞
不作傷舊將之淪亡痛先友之零落然勅葬有典賜祭
有文始終恩禮昭其茂勲矧克成家有美諸子武已世
其金緋文將開于青紫光前振後生榮死哀公雖捐館
亦何憾哉茲發引之有期望故山兮遙邁爰致奠于一
觴渺予中而長嘸悠悠丹旆隱隱靈輦公神不亡庶其
鑒諸

祭禮部侍郎新昌俞公文

惟公東浙舊家蔚為時彥甲科致身允矣名宦回翔禮署敷歷兵曹南還最績西伐賢勞遂貳秩宗進副司馬恪恭神人安攘夷夏帝心簡在士論攸歸云胡邁疾遽與世違某等或在交遊或通家好忽聞訃音重為世悼靈輦載啟清酌一陳惟公來格有涕沾巾

祭陸職方文量母宜人文

猗嗟宜人德容清溫早克闢于姆教長獲配于儒門佐

夫有起家之力淑身無越戶之言有美賢嗣如鳳孤騫
既策名于甲榜屢進秩于樞垣宜人無恙幸荷天恩祝
仙齡于耄耋享祿養于晨昏輝輝鳳誥肅肅魚軒胡嬰
疾于京邸遽返柩于家園然福被諸孫慶源不竭銘書
太史世勸攸存慨人生之獲此撫修景而奚論某等友
于賢嗣義託荒墳黯緇塵于北洗揚丹旄于南轅望吳
山兮隱隱渺滄海兮沄沄有牲升俎有酒注尊敢薄侑
以哀些恭致奠于貞魂貯其鑒止于飲于飧嗚呼哀哉

先祠初作神板告文

敏政薄宦于朝不能守奉先祠連歲卜居祀事苟簡負
不孝之罪大且久矣謹于仲春既望竊取司馬氏神板
之文及于朱子降殺神主之說初作新牌以備行祠之
制伏惟尊靈降妥于斯以永庇我後人不勝追慕依戀
之至謹告

祭亡弟克儉文

維成化二十三年歲次丁未五月庚子朔二十六日乙

丑長兄暨合家眷等致奠於亡弟克儉之靈曰嗚呼先
公四男伯仲叔季喜莫如予最多兄弟稚穉壯殞曾幾
何年悲孰似我無一弟焉子稟素豐我病多憊家事萬
千將子是賴云胡棄我薦然委形號天扣地忍不予應
毋氏在堂壽開七袞不共稱觴此恨何極諸孤子女縈
纍滿前觸目傷感有淚如泉壽否窮通苦不可關命也
奈何願子無憾將求善地以崇子封力訓吾姪以亢予
宗白日西馳流水東逝人生可憐倏忽如寄靈車戒曉

暫寓僧房登堂顧盼恍如未亡手酌一卮中腸寸裂骨肉在庭與子永訣嗚呼哀哉尚享

月河寺亡弟啟殯告文

維成化二十三年歲次丁未七月戊戌朔三十日丁卯
劣兄以酒果牲醴奠于亡弟克儉之靈曰惟汝之柩暫
厝僧房不覺四旬矣天暑漸退南舟可行擬于八月一
日啟殯上載特來訣別酌此一觴天乎慟哉汝真往矣
嗚呼尚享

祭定西侯蔣公文

維成化二十三年歲次丁未秋九月丁酉朔越二十日
丙辰某官某等敬備牲醴之儀致祭于故太保兼太子
太傅定西侯追封涼國公諡敏毅蔣公之靈曰嗚呼智
足以籌邊勇足以破賊猗惟公之材武為世勲而出色
力四殫于致主心屢懷于獻忠猗惟公之謀謨與上宰
而分功正宜沐渙恩享高壽靖四方輔明后垂偉烈于
汗青騰休光于介冑云胡疾疢竟殞將星朝議為之驚

惜聖衷為之靡寧奠遣秩宗賻出內帑飾終加新爵之
封勅葬近先公之壤始卒恩禮鬱乎爛然方諸既往孰
與差肩矧嗣侯之克繼又何憾于重泉惟公誼篤斯文
樂親良友如我輩之踈慵亦恒期于耐久追思接席談
笑相忘倏焉致奠涕泗悲傷慨流光之難挽喜令名之
不亡筆陣鋒閒詩壇盟解盡此一卮想見風采嗚呼尚
享

祭太醫院使錢君宗嗣文

惟君世業軒岐，通書史號稱儒醫。受聘而起衆中，穎出供奉尚方。九重之眷一代之良，活人功多靡憚勞逸。雖罄厥心，竟殫其力。訃聞于上，卹典重申。錫之御奠，官其嗣人。生榮死哀，君亦何忤。惟交游中孰其殽藥，遙遙京口，隱隱佳城。賢聲不替，有誄有銘。几筵既遷，靈輜載道。爰酌一觴，涕泗相悼。

祭襄城侯夫人汪氏文

巍巍戚里有毓，其華赫赫功臣。有宜厥家，出專師垣。入

贊皇略夫君在公內顧有託事親以敬御下以恩克相
夫君閭範斯行孰褒其名鸞書玉軸孰責其身翟冠象
服維容之懿維德之貞備福偕老庶幾稱情忽驚訃音
上動宸極諭奠有儀賜葬有勅窀穸揚芳有嚴刻文春
秋主祀有美世勲歿焉盡傷生也榮豔猗嗟夫人亦復
何憾某等夫君末契屬在同朝惜茲內助溘焉早凋畫
嬰載陳丹旌將出敢酌一觴幸鑒于室嗚呼哀哉尚享

祭太僕卿韓公世安文

惟公通練之姿文獻之胄選試而升比于論秀早典秘書法從周旋晚司譯文國威用宣鴻臚中書天曹太僕屢更其銜亦賦其祿謂公弗顯三品崇階謂公弗壽七袞將開從事詞林莫如公久告哀九重卹典亦厚賜葬有儀諭莫有章始終恩遇可謂非常某等與公交游式相情好撫公之喪聿增感悼觴奕之樂笑語之溫不可復矣敬酌一尊

祭都憲東安李公文

嗚呼公乎人方祝松喬之齡仰著蔡之德庶一代之老
成為後進之矜式忽聞捐館罔不太息而況有通家之
素供弟子之職失所瞻依可勝痛惻雖然正大之學高
明之識位列卿則世誦其賢勞居諫垣則史載其遺直
已貴而守儒之常未老而求去之亟矧一經之承傳嘉
四子之軒特諭冀有儀賜葬有勅哀榮始終天固無忒
彼容悅以圖功名或奔走而矜智力以彼較此孰豐孰
嗚呼公乎其何可得其幸聆教言獲奉顏色操几杖

以無從驚發引之在即敬酌一觴有涕沾臆

陞官祭告先祠文

惟渺孫不肖伏蒙聖天子嗣位念及宮僚濫進兩階改服金紫仰承遺訓懼切于衷爰自國卹以來屢奉山陵之役未仲虔告歲律將更謹以潔牲粢盛醴齊祗薦歲事俯伏上聞不勝哀慕尚享

祭土地文

維成化二十三年歲次丁未十二月丙寅朔三十日乙

未詹事府少詹事兼翰林院侍講學士某昭告于本宅
土地之神曰惟神奠我家為惠甚大云胡今歲人口
多虞疑有不恭以獲茲戾此者再新堂室次第工完小
子何知乃逢幸會仰承新命濫進官階非藉神休弗克
臻此感恩謝罪敬薦微忱俯冀來歆永垂庇佑尚享

祭叔父明威府君文

維弘治元年歲次戊申夏四月甲午朔姪男詹事府少
詹事兼翰林院侍講學士敏政謹具牲醴之儀馳奠于

叔父明威將軍潘陽中屯衛僉指揮事府君之靈曰嗚呼惟我先公兄弟二人競興起家如車兩輪勲立名成允文允武以迪後昆以顯先祖孰期中道上躋先公江北江南抱恨無窮一門之中幸存叔父恒率家人以祝多祐夫何遽疾奄忽三時委棄諸孤遽止于斯六袞修齡未為不壽萬戶崇階未為不偶叔父何憾我心則傷骨肉幾許相繼淪亡羈宦于朝莫由視殯千里瀛洲臂不能奮奉安遺體幸卜佳城奉揚偉烈敬製新盟遙望

几筵薄陳告祭叔父有靈鑒我誠意嗚呼哀哉尚享

南歸過河間告先墓文

維弘治二年歲次己酉三月己未朔初九日丁卯孝曾
孫詹事府少詹事兼翰林院侍講學士敏政祇領孝玄
孫錦衣衛百戶堦敢昭告于顯曾祖考贈兵部尚書兼
大理寺卿府君顯曾祖妣贈夫人汪氏顯祖考贈兵部
尚書兼大理寺卿府君顯祖妣贈夫人張氏叔祖考處
士府君墓下曰於惟祖考垂裕深長俾我後人獲霑訖

蔭藐孫無似竊祿有年守官弗良遂隳先訓仰荷天子
宥罪念功得放歸田感恩何極瀛東之里冠珮攸藏謹
奠一觴不勝惶懼末由戾止時奉塋園將返新安省循
朝命修身補過用畢餘生惟是幼男暫回寄祿主承宗
祀責在于斯願相其成以光門緒啟行在即惟靈鑒之
謹告

告叔父明威府君墓文

嗚呼丙午之歲拜叔于堂喜極呼飲歌笑洋洋今茲之

來拜叔于墓宿草萋萋酹此清醑人生幾何世路孔艱
姪亦老矣獲歸故山先公在南叔父在北姪雖踈慵敢
自乖隔舉家登陸告別而行惟叔如在鑒此衷情

祭孀母恭人劉氏文

嗚呼叔父捐館猶未期年叔母在堂期臻遐算何家不
造相繼而終旅邸訃聞曷勝哀感今茲奉母得還故鄉
謹伏几筵用伸奠告子婦咸在靈其來歆嗚呼哀哉

祭錢氏妹文

維某年某月某日長兄備牲醴之儀令男錦衣衛百戶
堦拜奠于亡妹錢氏婦恭人貞善之靈曰嗚呼女弟之
中惟汝最長介淑之行允宜厥家云胡壯年遽爾長逝
幸焉有子可振芳聲手足之情悲何能已靈筵一酹汝
其鑒之

告謝南山后土文

維弘治二年歲在己酉十一月二十四日某官某敢昭
告于南山后土氏之神曰疇昔之夜小女月仙病痘天

歿倉卒瘞于茲山告祭弗嚴不勝惶懼敬以牲醴用伸
謝謹惟神鑒之謹告


祭告五祀衆神文

維弘治三年歲次庚戌春二月癸未朔十五日丁酉具
官某敢昭告于司命之神司竈之神司門之神土地之
神司厲之神遠祖忠壯公之神周孝友張僊之神漢壽
亭侯關忠義公之神唐越國汪公之神唐睢陽守中丞
張公之神曰惟我家仰托神庇獲奠斯土亦既有年

通者歸田考閱祀禮主像雜探神不顧歆況我有先實
惟忠壯乃無專祀於義尤乖謹于中堂敬安遺像其諸
所奉位號再新有嚴斯辰衆靈是安人心既協神理攸
宜用告其誠尚希昭格

聞三叔祖處士之訃告文

嗚呼一宗長幼惟翁是尊方冀明年八袞是慶相違半
載遽聞訃音南望故山曷勝悲悼敬率婦子發哀於堂
惟尊靈其鑒之尚享



筆壘文集卷五十一